

12. okt. 2017

**Kommunit inatsimmi peqqussutaasut naapertorlugit pisortat ikiorsiissutinik tunniussinerminnut atatillugu qanoq annertutigisumik ikiorsiissutit aningaasanngornagit tunniussisarnersut misissoqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinnermut atatillugu aamma inneruussutinik saqqumiusseqqunneqarput inatsisitigut qanoq pitsaanerpaamik kusanarnerpaamillu qularnaarneqarsinnaanersoq, atisassat aamma allat meeqqat pisariaqartitaat eqqarsaatigalugit angajoqqaat kiisalu allat meeqqanut angerlarsimasunut isumassuisut qulakkeerisalernissaat siunertaralugu.**

(Inatsisartunut ilaasortaq Nivi Olsen, Demokraatit)

Siumup nuannaarutigivaa takusinnaagamiuk Naalakkersuisut SIUMUT Isumaginninnermut Naalakkersuisuutitaqarallarmalli suliat aallartinneqarsimasut Naalakkersuisunit attanneqarmata.

Pisortanit ikiorsiissutit nutarterneqarnissaat aallartisarlugu siornali Siumut naalakkersuisuutitaqarmalli ilaatigut akiitsoqarneq pillugu, taakkualu imminut pilersulernissamut aporfissaqartitsisinnarnersut pillugit suliffeqarfiit soqutigisaqatigiiffiillu assigiinngitsut isumasioqatigiitsillugit ilaatigut pisortanik ikiorsiissutit nutarterneqarnissaanut nalilersuinerit aallartisarneqareerput.

Tamatumalu kingunerisaanik Kommune Kujallermi INI A/S, Grønlandsbanken Namminersorlutillu oqartussaata akiitsugassaqaalersimasunut siunnersuineq misileraatitut aallartinneqalernera. SIUMUT tamanna assut pisariaqartutut isigaa aammalu misilittakkat qanoq ikkumaarnersut tusarfiginissaat erinigalugu utaqqissavarput.

Pisortanimmi ikiorsiissutit nutarterneqarnissaat Naalakkersuisoqatigiit suleqatigiinnissamut isumaqatigiissutaani, soorlu Naalakkersuisut erseqqissaatigigaat tamanna pioreerpoq aammalu aallartisarneqareerluni.

Inatsisartut Peqqussutaa ukiorpassuarni taamatut isikkoqarluni ingerlanneqarnikuuvoq, taamaatumik nalilersuinissat aallartisarneqareersut allamut saqitinneqannginnissaat SIUMUT isumaqarpoq. Qilanaaraarpullu UKA2018-imut Naalakkersuisut nutarterinissamut inatsisissatut saqqummiussassaata takunissaa.

Innuttaasut sulisinnaassusaasa annertusaaffiguarneqarnissaat Siumumiit pingaartipparput, soorlu tamanna ukiuni kingullerni nutarterinermi aallaaviusimasoq. Siusinaartunik sulisinnaajunnaarner-siutit nutarternerisigut, piginnaanngorsaanerit nukittorsarnerisigut, Majoriap pilersinnerisigut, atonerluinermik katsorsaanerup akeerutsinneratigut, kinguaasiutitigut atonerlunneqarsimanerup kingunerluutaasa psykologit aqqutigalugit katsorsaanerit il.il.. SIUMUT isumaqarpoq aqqutissat tamakkua pingaaruteqarluinnartut inuup nammineerluni inuunermini akisussaaffimmik tigusiin-saanut.

Soorunami aamma inuttut isiginnittaaseq tassani apeqqutaasorujussuuvoq, upperalugu inuit tunngaviusumik imminnut pilersorusussinnaanerit aammalu nammineerusussinnaanerit, tapersersuinikkut ikiuinikkullu anguneqarsinnaasoq imaluunniit pillarlugit inuit pineqassanersut.

SIUMUP tunngaviusumik upperaa inuit aporfeqarnertik pissutigalugu inuunerlussinnaasut, tapersersorneqarlutillu ikorserneqarunik nukittorlutik imminnut meeqqaminullu pilersuisunngorsinnaasut.

Taamaattumik SIUMUT sinnerlugu oqaatigeqqissavara Naalakkersuisut siunnerfiat UKA2018-mi pisortanik ikorsiisarnerup inatsisissamik nutaasumik nutarterinermik aallaavilimmik saqqummius-sinerat qilanaaralugu utaqqimaassagatsigu.

Suliarlu ingerlareermat siunnersuutigineqartoq itigartinneqarnissaa innersuutigaarput.

Martha Lund Olsen  
SIUMUT